

## Канон о единой усопшей

Молитвами святых отец наших, Господи Иисусе Христе Боже наш, помилуй нас. Аминь.

Святой Боже, Святой крепкий, Святой бессмертный, помилуй нас. *(Читается трижды, с крестным знаменем и поясным поклоном.)*

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святой, посети и исцели немощи наша, имене Твоего ради.

Господи, помилуй *(трижды)*.

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, якоже и мы оставляем должником нашим; и не введи нас во искушение, но избави нас от лукаваго.

Господи Иисусе Христе, Сыне Божий, помилуй нас. Аминь.

Господи, помилуй *(12 раз)*.

Слава Отцу и Сыну и Святому Духу, и ныне и присно и во веки веков. Аминь.

Приидите, поклонимся Цареву нашему Богу *(поклон)*.

Приидите, поклонимся и припадем Христу, Цареву нашему Богу *(поклон)*.

Приидите, поклонимся и припадем Самому Христу, Цареву и Богу нашему *(поклон)*.

### Псалом 90

Живый в помощи Вышняго, в крове Бога небесного водворится. Речет Господеви: заступник мой еси и прибежище мое, Бог мой, и уповаю на Него. Яко Той избавит тя от сети ловчи, и от словесе мятежна, плещма Своима осенит тя, и под криле Его надеешися, оружием обыдет тя истина Его. Не убоишися от страха ночного, от стрелы летящая во дни, от вещи во тьме преходящая, от сряща и беса полуденного. Падет от страны твоея тысяща, и тьма одесную тебе, к тебе же не приблизится, обаче очима твоима смотриши и воздаяние грешников узриши. Яко Ты, Господи, упование мое; Вышняго положил еси прибежище твое. Не приидет к тебе зло, и рана не приблизится телеси твоему, яко Ангелом Своим заповесть о тебе, сохранити тя во всех путех твоих. На руках возмут тя, да не когда преткнеша о камень ногу твою; на аспида и василиска наступиши, и попереши льва и змия. Яко на Мя упова, и избавлю и: покрую и, яко позна имя Мое. Воззовет ко Мне, и услышу

его, с ним есмь в скорби, изму его и прославлю его, долгою дней исполню его и явлю ему спасение Мое.

Слава Отцу и Сыну и Святому Духу, и ныне и присно и во веки веков. Аминь.

Аллилуия, аллилуия, аллилуия, слава Тебе, Боже (*трижды*).

Господи, помилуй (*трижды*)

### ***Тропарь, глас 8-й***

Глубиною мудрости человеколюбно вся строяй и полезная всем подаваяй, Едине Содетелю, упокой, Господи, душу рабы Твоея, на Тя бо упование возложи, Творца и Зиждителя и Бога нашего.

*Слава, и ныне: Богородичен:* Тебе и стену, и пристанище имамы, и молитвенницу благоприятну к Богу, Егоже родила еси, Богородице Безвестная, верных спасение.

### ***Псалом 50***

Помилуй мя, Боже, по велицей милости Твоей, и по множеству щедрот Твоих очисти беззаконие мое. Наипаче омой мя от беззакония моего, и от греха моего очисти мя. Яко беззаконие мое аз знаю, и грех мой предо мною есть выну. Тебе единому согреших и лукавое пред Тобою сотворих, яко да оправдишися во словесех Твоих и победиши, внегда судити Ти. Се бо, в беззакониих зачат есмь, и во гресех роди мя мати моя. Се бо, истину возлюбил еси, безвестная и тайная премудрости Твоея явил ми еси. Окропиши мя иссопом, и очищуся, омыеши мя, и паче снега убелюся. Слуху моему даси радость и веселие, возрадуются кости смиренныя. Отврати лице Твое от грех моих, и вся беззакония моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица Твоего, и Духа Твоего Святого не отыми от мене. Воздаждь ми радость спасения Твоего и Духом владычним утверди мя. Научу беззаконныя путем Твоим, и нечестивии к Тебе обратятся. Избави мя от кровей, Боже, Боже спасения моего, возрадуется язык мой правде Твоей. Господи, устне мои отверзеши, и уста моя возвестят хвалу Твою. Яко аще бы восхотел еси жертвы, дал бых убо, всесожжения не благоволиши. Жертва Богу дух сокрушен, сердце сокрушенно и смиренно Бог не уничижит. Ублажи, Господи, благоволением Твоим Сиона, и да созиждутся стены Иерусалимския. Тогда благоволиши жертву правды, возношение и всесожегаемая, тогда возложат на олтарь Твой тельцы.

# Канон, глас 8-й

## **Песнь 1**

*Ирмос:* Воду прошел, яко сушу, и египетского зла избежав, израильтянин вопияше: Избавителю и Богу нашему поим.

**Припев: Покой, Господи, душу усопшия рабы Твоея.**

Отверз уста моя, Спасе, слово ми подаждь молитися, Милосерде, о преставленной рабе Твоей, *имярек*, да покоиши душу ея, Владыко.

**Покой, Господи, душу усопшия рабы Твоея.**

Мертв быв плотию, Спасе, и во гробе положен с мертвыми, душу рабы Твоея покой в месте злачне, яко Милосерд.

*Слава:* Молебный глас мой услыши, Боже Триипостасне, и учини душу преставленную в недрах Авраамлих, Избавителю.

*И ныне:* Ты, Пречистая Богородице, Егоже без искуса мужеска заченши родила еси, моли Сына Твоего подати покой рабе Твоей преставленной, *имярек*.

## **Песнь 3**

*Ирмос:* Небеснаго круга Верхотворче, Господи, и Церкви Зиждителю, Ты мене утверди в любви Твоей, желаний краю, верных утверждение, Едине Человеколюбче.

**Покой, Господи, душу усопшия рабы Твоея.**

В месте злачне, в месте покойне, идеже лица святых веселятся, душу рабы Твоея преставленную покой, Христе, Едине Милостиве.

**Покой, Господи, душу усопшия рабы Твоея.**

Идеже лица святых, тамо вчини, Владыко, послужившую Тебе всем сердцем и воздвигшую иго Твое на рамо свое, яко Един Владыка живота и смерти.

*Слава:* Небесный Отче Вседержителю, и Сыне Единородный, и Душе Святой Исходный, презри умершия согрешения, и в Церкви первенец всели ю, славить Тя со всеми угождшими Тебе.

*И ныне:* Яко Мати Святая Пресвятаго Бога, Владычице всяческих, Марие Богородице, со всеми святыми Сего моли душу покоити рабы Твоея, *имярек*, в небесных селениих.

Господи, помилуй (*Трижды*)

## **Седален, глас 5-й**

Покой, Спасе наш, с праведными рабу Твою, и сию всели во дворы Твоя, якоже есть писано, презирая, яко благ, прегрешения ея вольная и невольная, и вся яже в ведении и не в ведении, Человеколюбче.

*Слава, и ныне, Богородичен:* От Девы возсиявый миру, Христе Боже, сыны света Тою показавый, помилуй нас.

## **Песнь 4**

*Ирмос:* Услышах, Господи, смотрения Твоего таинство, разумех дела Твоя и прославих Твое Божество.

**Покой, Господи, душу усопших рабы Твоея.**

Сошедый в преисподняя, Христе, совоздвигл еси умерших вся, и престаившуюся от нас покой, Спасе, яко щедр.

**Покой, Господи, душу усопших рабы Твоея.**

Никтоже без греха есть, токмо Ты Един, Владыко, сего ради престаившей и грехи остави, и в рай тую всели.

*Слава:* Услыши, Троице Святая, гласы молебных, приносимых Тебе в церкви о усопшей, и Богоначальным Твоим светом озари душу, омраченную суетными привержениями.

*И ныне:* Родила еси, Пречистая, без мужеска семени, Бога совершенна и Человека совершенна, вземлющего грехи наша, Дево. Того моли, Госпоже, престаившейся рабе Твоей подати покой.

## **Песнь 5**

*Ирмос:* Просвети нас повелении Твоими, Господи, и мышцею Твоею высокою Твой мир подаждь нам, Человеколюбче.

**Покой, Господи, душу усопших рабы Твоея.**

Имый живота и смерти власть, престаившую от нас покой, Христе Боже, Ты бо еси всех, Спасе, покой и живот.

**Покой, Господи, душу усопших рабы Твоея.**

На Тя, Спасе, надежду возложь, умершая отыде от нас; Ты же, Господи, ущедри ю, яко Бог многомилостив.

*Слава:* Просвети нас, Трисвяте, воспеваемый Владыко, молящихся Тебе, мир небесный прияти, и в мирных селех душу вчини, отшедшую от временных в надежде безконечных жизни.

*И ныне:* Шуйяго стояния, Пречистая, избавити престаившую умоли Сына Твоего, Дево Госпоже, яко Спаса и Бога нашего Мати сущая.

## **Песнь 6**

*Ирмос:* Молитву пролию ко Господу, и Тому возведу печали моя, яко зол душа моя исполнися и живот мой аду приближися, и молюся, яко Иона: от тли, Боже, возведи мя.

**Покой, Господи, душу усопших рабы Твоея.**

Ада испроверг, Владыко, воскресил еси умерших от века: и ныне престаившую от нас, в недро Авраамле Ты, Боже, всели, прегрешения вся отпустив, яко Милосерд.

**Покой, Господи, душу усопших рабы Твоея.**

Заповедь, юже ми дал еси, Боже, преступих и смертен бых, но Ты, Боже, сошедый во гроб и души яже от века воскресивый, не возстави мене, Владыко, на мучение, но на покой, престаившая вопиет Тебе с

нами, Многомилостиве.

*Слава:* Молим Тя, безначальне Отче и Сыне и Душе Святой, злобою душезлобного мира озлобленную и к Тебе, Зиждителю, прешедшую душу во адово дно не отрини, Боже Спасе мой.

*И ныне:* С небесе Христос Бог наш, яко дождь на руно, Пречистая, сниде на Тя, напаяя весь мир и изсушая вся безбожныя потоки, наводняяй всю землю разумом Своим, Приснодево; Того моли дати покой преставленной рабе Твоей, *имярек*.

Господи, помилуй (*Трижды*). Слава и ныне:

### ***Кондак, глас 8-й***

Со святыми упокой, Христе, душу рабы Твоея, идеже несть болезнь, ни печаль, ни воздыхание, но жизнь безконечная.

### ***Икос***

Сам един еси Безсмертный, сотворивый и создавый человека; земнии убо от земли создахомся и в землю туюжде пойдём, якоже повелел еси, Создавый мя и рекий ми: яко земля еси и в землю отыдеши, аможе вси человецы пойдём, надгробное рыдание творяще песнь: аллилуия, аллилуия, аллилуия.

### ***Песнь 7***

*Ирмос:* От Иудеи дошедше отроцы, в Вавилоне иногда, верую Троическою пламень пещный попраша, поюще: отцев Боже, благословен еси.

**Покой, Господи, душу усопшия рабы Твоея.**

Владыко Христе Боже, егда хоцещи судити миру, пощади душу рабы Твоея, егоже от нас приял еси, вопиющаго: отец наших Боже, благословен еси.

**Покой, Господи, душу усопшия рабы Твоея.**

В пищи райстей, идеже праведных души веселятся, послуживших Тебе, причти с ними, Христе, душу рабы Твоея, воспевавшая: отец наших Боже, благословен еси.

*Слава:* Иудейския три отроки спасый во огни, в Трех Лицах воспетый, избави огня вечнаго усопшую, воспевающую Ти верно: отец наших Боже, благословен еси.

*И ныне:* Владыку Христа рождшая, всех Бога, власти темныя воздушнаго князя избави, Дево, душу преставльшияся в вере и воспевавшая: отец наших Боже, благословен еси.

### ***Песнь 8***

*Ирмос:* Седмерицею пещь халдейский мучитель богочестивым неистовно разжже, силою же лучшею спасены сия видево, Творцу и Избавителю вопияше: отроцы благословите, священницы воспойте, людие превозносите во вся веки.

**Покой, Господи, душу усопшия рабы Твоея.**

Скончав течение и к Тебе прибегах, Господи, преставленная вопиет ныне, прегрешения остави, Христе Боже, и не осуди мене, егда хоцещи судити всем, верно бо Тебе взывах: вся дела Господня, Господа пойте и превозносите Его во веки.

**Покой, Господи, душу усопшия рабы Твоея.**

Понесшую, Владыко, иго Твое на раме своем, и бремя Твое легкое, аще и не всегда, обаче в месте преподобных Твоих всели душу ея, воспевшия Тебе, Христе Спасе: отроцы благословите, священницы воспойте, людие превозносите Его во веки.

**Благословим Отца и Сына и Святаго Духа, Господа.**

Безначальная Троице Святая, Боже Отче и Сыне и Душе Святый, в лице святых причти душу преставленную рабы Твоея и огня вечнаго избави, да Тя хвалит, воспевая во веки: отроцы благословите, священницы воспойте, людие превозносите Его во веки.

*И ныне:* Тя, Дево, пророчестии лица прорекоша, прозряще бо Тя прозорливыма очима: ов убо жезл нарече Тя, ин же дверь восточную, ов же гору человеки несекомую. Мы же исповедуем Тя воистинну Богородицу, Бога всяческих рождшую, Егоже моли упокоити преставленную во веки вся.

## ***Песнь 9***

*Ирмос:* Ужасеся о сем небо, и земли удивишася концы, яко Бог явися человеком плотски, и чрево Твое бысть пространнейшее небес. Тем Тя, Богородицу, Ангелов и человек чиноначалия величают.

**Покой, Господи, душу усопшия рабы Твоея.**

Иисусе Боже мой, Спасе, Адамле Ты взял еси преступление и смерти вкусил еси, да человеки от нея свободиши, Милосерде. Темже молим Тя, Милостиве: преставленную покой, яко благ, во дворах святых Твоих, яко Един всеблагий и милосердый.

**Покой, Господи, душу усопшия рабы Твоея.**

Несть никтоже, Милосерде, иже не согреши в человецех, токмо Ты един, Иисусе Христе, взявляя грехи всего мира. Темже, очистив рабу Твою от прегрешений, вчини во святых Твоих дворах, Ты бо живота еси и покой, и свет, и веселие всех, Тебе благоугодивших.

*Слава:* Удивися все естество человеческое, како безначальнаго Отца Сын сый едиnorodный, плоть от Девы действием Святаго Духа приял еси, и пострадал еси яко человек, да умершия оживиши. Тем и преставленную ныне от нас, прилежно молим Тя, во стране живых, яко Благ, всели.

*И ныне:* Невесту Тя нарицаем, Пречистая, Отца невидимаго, и Матерь Сына, из Тебе Духом Святым воплощеннаго, и молебницу Тя о усопшей рабе Твоей, *имярек*, предлагаем: Тебе бо помощницу имамы, земнии, и любовь поюще Тя величаем.

Достойно есть яко воистинну блажити Тя, Богородицу, присноблаженную и пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем (*поклон*).

Святый Боже, Святый крепкий, Святый безсмертный, помилуй нас (*трижды*).

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святый, посети и исцели немощи наша, имене Твоего ради.

Господи, помилуй (*трижды*).

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех! Да святится имя Твое, да приидет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, якоже и мы оставляем должником нашим; и не введи нас во искушение, но избави нас от лукаваго.

Господи Иисусе Христе, Сыне Божий, помилуй нас. Аминь.

### ***Тропари, глас 4-й***

Со духи праведных скончавшихся душу рабы Твоея, Спасе, упокой, сохраняя ю во блаженной жизни, яже у Тебе, Человеколюбче.

В покоищи Твоем, Господи, идеже вси святии Твои упокоеваются, упокой и душу рабы Твоея, яко един еси человеколюбец.

*Слава:* Ты еси Бог, сошедый во ад и узы окованных разрешивый, Сам и душу рабы Твоея упокой.

*И ныне:* Едина чистая и непорочная Дево, Бога без семене рождшая, моли спастися души ея.

Господи, помилуй (*40 раз*).

### ***Молитва***

Помяни, Господи Боже наш, в вере и надежди живота вечного усопшую рабу Твою, *имярек*, и яко благ и человеколюбец, отпускай грехи и потребляяй неправды, ослаби, остави и прости вся вольная ея согрешения и невольная, возставляя ю во святое второе пришествие Твое в причастие вечных Твоих благ, ихже ради в Тя Единого верова, истинного Бога и Человеколюбца. Яко Ты еси воскресение и живот, и покой рабе Твоей, *имярек*, Христе Боже наш. И Тебе славу возсылаем, со безначальным Твоим Отцем и с Пресвятым Духом, ныне и присно и во веки веков, аминь.

Честнейшую Херувим и Славнейшую без сравнения Серафим, без истления Бога Слова рождшую, сущую Богородицу (*поклон*).

Слава Отцу и Сыну и Святому Духу (*поклон*), и ныне и присно и во веки веков. Аминь (*поклон*).

Господи, помилуй (*трижды*).

Господи, благослови (*поклон*).

Господи Иисусе Христе, Сыне Божий, молитвами Пречистыя Твоя Матере, преподобных и богоносных отец наших и всех святых помилуй и упокой душу рабы Твоя, *имярек*, в безконечныя веки, яко благ и человеколюбец, аминь,

Рабе Божии, *имярек*, усопшей вечная память, вечная память, вечная память.

***И читаем трижды тропарь с поклонами:***

Покой, Господи, душу усопшия рабы Твоя, *имярек* (*поклон*), и елико в житии сем яко человек согреши, Ты же, яко человеколюбец Бог, прости ю и помилуй (*поклон*), вечныя муки избави (*поклон*), Небесному Царствию причастницу учини (*поклон*) и душам нашим полезная сотвори (*поклон*).